



Ustrajnost na putu vjere (Meka)

Hatib: dr. Jasir ibn Rašid ed-Devseri

19. zulhidže 1447. po Hidžri / 5. juni 2026.

Hvala Allahu, Koji je odredio ponos, uspjeh i Svoju podršku onima koji Mu se pokoravaju i Njega se boje, a poniženje i sramotu onima koji se suprotstavljaju Njegovim naredbama i griješe prema Njemu. Hvalim Ga hvalom onoga koji priznaje blagodat svoga Gospodara, i zahvaljujem Mu, jer Njegova dobrota neprestano obasipa one koji Mu se predaju i na Njega oslanjaju. Svjedočim da nema boga osim Allaha, Jedinog, Koji nema sudruga, nema uspjeha osim u pokornosti Njemu, niti ima spasa osim u Njegovoj milosti, i svjedočim da je Muhammed, sallallahu alejhi ve sellem, Njegov rob i poslanik, neka su Allahova milost, blagoslov i spas na njega, njegovu porodicu, njegove ashabe i sve one koji slijede njegov put.

Bojte se Allaha, i budite svjesni Njegovog nadzora, u tajnosti i javnosti, i budite od onih koji se boje stajanja pred svojim Gospodarom i koji svoju dušu odvrćaju od prohtjeva, i opskrbite se bogobojažnošću, jer je ona najbolja opskrba.

Hodočasnici Allahove časne Kuće, gosti Milostivog!

Iza nas su dani jednog od najvećih i najuzvišenijih ibadeta. Završeni su dani hadža sa svim blagodatima, koristima i nagradama koje nose. O vi koji ste se odazvali Allahovom pozivu, neka vam je mubarek ovaj odabir i počast kojom vas je Allah odlikovao! Došli ste iz dalekih krajeva i udaljenih zemalja, odazvali ste se pozivu svoga Gospodara i pristizali na Njegova vrata, skupina za skupinom, veličajući Allahove svetinje i Njegove časne obrede, a vaši jezici bili su ispunjeni riječima tevhida na svetim mjestima.

Neka vam je mubarek završetak ovog velikog ibadeta i ono čime vas je Allah obdario od Svoje dobrote i blagodati. Uzvišeni Allah kaže: "Reci: 'Neka se zato Allahovoj blagodati i milosti raduju, to je bolje od onoga što gomilaju.'" (Junus, 58)





Znajte, Allah vam se smilovao, da je jedan od najjasnijih znakova primljenog hadža i Allahovog zadovoljstva čovjekom njegova ustrajnost u pokornosti Allahu i postojanost na Pravom putu. Zato je postojanost u Allahovoj vjeri težnja iskrenih vjernika i poputnina dobročinitelja. Ona je neosvojiva tvrđava, čvrst oslonac, postojana stijena pred olujama i uzdignuta planina pred silovitim bujicama. Njome se čuva ljudska priroda od izopačenja, razum od zastranjenja, a srce od kolebanja i udaljavanja od Istine.

O vjernici, postojanost u vjeri Allahova je oporuka Njegovom vjerovjesniku i odabranom poslaniku. Uzvišeni kaže: "Zato veličaj Gospodara svoga i hvali Ga, i molitvu obavlja, i sve dok si živ, Gospodaru svome se klanjaj!" (El-Hidžr, 98–99)

Enes, radijallahu anhu, prenosi da je Allahov Poslanik, sallallahu alejhi ve sellem, često učio: "O Ti koji okrećeš srca, učvrsti moje srce u Svojoj vjeri." Enes je upitao: "Allahov Poslaniče, mi vjerujemo u tebe i u ono s čim si došao. Zar se bojiš za nas?", a on odgovori: "Da. Srca su između dva prsta Milostivog i On ih okreće kako hoće." (Tirmizi)

Uzvišeni Allah pojasnio je da je postojanost blagodat kojom daruje Svoje robove i na ovom i na budućem svijetu: "Allah će vjernike postojanom riječju učvrstiti i na ovome i na onome svijetu, a nevjernike će u zabludi ostaviti; Allah radi šta hoće" (Ibrahim, 27).

Oni koji su ostali postojani bili su iskreni pa su ustrajali, bili su na Pravom putu pa nisu skrenuli. Zato su zaslužili da im se, Allahovom dobrotom, meleki spuštaju u času smrti, da otklone od njih strah i tugu i donesu im radosnu vijest o velikom uspjehu i plemenitom boravištu u džennetima uživanja.

Uzvišeni kaže: "Onima koji govore: 'Gospodar naš je Allah' – pa poslije ostanu pri tome – dolaze meleki: 'Ne bojte se i ne žalostite se, i radujte se Džennetu koji vam je obećan. Mi smo zaštitnici vaši u životu na ovome svijetu, a i na onome; u njemu ćete imati sve ono što duše vaše zažele, i što god zatražite imat ćete, bit ćete počašćeni od Onoga Koji prašta i Koji je milostiv.'" (Fussilet, 30–32)





Ebu Bekr es-Siddik, radijallahu anhu, rekao je: "To su oni koji Allahu nisu pridruživali druga i koji se nisu okretali nikome mimo Njega."

O muslimani, postoje brojni uzroci i sredstva koja vode postojanosti u vjeri. Ko ih prihvati i bude ih se pridržavao, Allahovom dozvolom ostvarit će ono čemu teži i postići ono što želi. Allah će ga učvrstiti na uputi i sačuvati ga od zablude i propasti.

Najvažniji od tih uzroka jeste istinsko ostvarenje tevhida, čvrsto oslanjanje na Allaha i traženje pomoći od Njega. Uzvišeni kaže: "Samo Tebe obožavamo i samo od Tebe pomoć tražimo. Uputi nas na Pravi put." (El-Fatiha, 5–6)

Nakon toga dolazi čvrsto držanje Allahove Knjige i sunneta Njegovog Poslanika, sallallahu alejhi ve sellem, kroz njihovo učenje, razumijevanje, poznavanje i primjenu. Poslanik, sallallahu alejhi ve sellem, oporučio je svome ummetu ovaj veliki temelj riječima: "Ostavio sam vam dvije stvari; nećete zalutati sve dok ih se budete držali: Allahovu Knjigu i sunnet Njegovog Vjerovjesnika." (Malik)

Ko se bude čvrsto držao Kur'ana i sunneta, neće posrnuti na svome putu, neće zalutati u razumijevanju vjere, neće ga odvesti sumnje niti će ga zavesti strasti.

Uzvišeni Allah kaže: "Reci: 'Od Gospodara tvoga objavljuje ga melek Džibril kao istinu, da još više učvrsti vjernike u vjerovanju, i da bude putokaz i radosna vijest svim muslimanima.'" (En-Nahl, 102)

Jedan od najvažnijih temelja postojanosti u vjeri jeste i pridržavanje puta prvih generacija muslimana i njihovog razumijevanja vjere. Irbad ibn Sarija, radijallahu anhu, prenosi da je Allahov Poslanik, sallallahu alejhi ve sellem, rekao: "Držite se moga sunneta i sunneta pravednih i upućenih halifa poslije mene. Čvrsto ga se držite i uhvatite se za njega svojim kutnjacima." (Ebu Davud)

Zato hodite njihovim putem i vjeru uzimajte od učenih i bogobojaznih učenjaka, njihovih dostojnih nasljednika. Posebno im se obraćajte u vremenima smutnji i kada se pojave sumnje i nedoumice, jer su učenjaci putokazi upute i svjetionici koji osvjetljavaju tamu.





Jedan od najbližih puteva ka postojanosti jeste upućivanje dove Allahu da čovjeka učvrsti u vjeri sve do smrti. Zato su iskreni vjernici učili: "Gospodaru naš, ne dopusti srcima našim da skrenu, kada si nam već na Pravi put ukazao, i daruj nam Svoju milost; Ti si, uistinu, Onaj Koji mnogo daruje!" (Ali Imran, 8).

Neprestano spominjanje Allaha pomaže čovjeku da ostane postojan. Zikr je neraskidiva veza između roba i njegovog Gospodara i najbolja duhovna opskrba. Zato je Uzvišeni Allah naredbu o zikru povezao sa postojanošću čak i u najtežim i najopasnijim trenucima.

Uzvišeni kaže: "O vjernici, kada se s kakvom četom sukobite, smjeli budite i neprestano Allaha spominjite da biste postigli što želite." (El-Enfal, 45)

Jedan od uzroka postojanosti jeste i druženje sa dobrim ljudima. Ebu Hurejra, radijallahu anhu, prenosi da je Poslanik, sallallahu alejhi ve sellem, rekao: "Čovjek je na vjeri svoga prijatelja, pa neka svako od vas dobro pazi s kim se druži." (Tirmizi)

Među uzrocima postojanosti jeste i ostavljanje grijeha i udaljavanje od loših postupaka. Ibn Mesud, radijallahu anhu, prenosi da je Allahov Poslanik, sallallahu alejhi ve sellem, rekao: "Čuvajte se potcjenjivanja grijeha, jer se oni gomilaju kod čovjeka sve dok ga ne unište." (Ahmed)

Zato, budite postojani! Kako je lijepo kada jedno dobro djelo slijedi drugo, i kako je veličanstveno kada se jedna pokornost nadoveže na drugu. A teško onome ko poruši ono što je izgradio i pokvari ono što je napravio.

Uzvišeni Allah kaže: "I ne budite kao ona koja bi svoju pređu rasprela kad bi je već bila čvrsto oprela." (En-Nahl, 92)

Hasan el-Basri, Allah mu se smilovao, rekao je: "Vjerniku nije određen rok u činjenju dobrih djela, osim smrti", a zatim je proučio riječi Uzvišenog: "i sve dok si živ, Gospodaru svome se klanjaj!" (El-Hidžr, 99).

Hodočasnici Allahove časne Kuće, gosti Milostivog!





Neka Allah primi vaš hadž, vaš trud i vaše ibadete, i neka nam svima podari da ove blagoslovljene sezone dobra dočekujemo još mnogo godina u zdravlju, sigurnosti i pokornosti Njemu.

Molimo Allaha da obilno nagradi sve one koji služe hadžijama, mu'temirima i posjetiocima Dvaju časnih harema i koji ulažu trud da im olakšaju obavljanje ibadeta. Neka primi njihov trud, obilno ih nagradi i podari im svako dobro. Doista, ono što ispunjava srce zadovoljstvom, budi osjećaj ponosa i zaslužuje zahvalnost jesu veliki naponi, brojni projekti i stalna nastojanja koja, Allahovom pomoći, olakšavaju obavljanje hadžskih obreda i doprinose uspješnoj organizaciji hadža.

Rezultat tih napora jeste i uspješno organiziran ovogodišnji hadž, kao još jedna karika u nizu uspješnih sezona hadža koje se nižu iz godine u godinu. Molimo Allaha da sačuva ovu veliku blagodat i počast služenja Njegovoj Svetoj kući i njenim posjetiocima.

O vjernici, donosite salavate i selame na onoga koji je poslan s mudrošću i uputom, najboljeg među ljudima i najodabranijeg među stvorenjima, kao što vam to naređuje vaš Gospodar: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56).

